

պայծառացուցին զեկեղեցին ընդարձակելով զլուսամուտս նորին, ծածկեցին զպատուհանն ուղղահայեայ 'ի գըմբեթին, զի սպակեայ կանթեղօք ծածկեալ էր յառաջագոյն, և իջանէր ջուր յանձրեւի. արարին փոքր գըմբեթ 'ի վերայ նորա, և ընդարձակեցին զ6 պատուհանս նորին, բարձրացուցին զկամարն ամպիոնին, շինեցին նաև զսենեակս ընդհըդականաց, որ կոչի Ս. Մեսսի Բաշ՝ և քարիւ յատակեցին զարտաքին գաւիթ վանաց, և նորոգեցին զայլ կարեւոր տեղիս: Բացին զպատուհանս ամենայն սենեկաց Բեթղէնէմի վանաց, և նորոգեցին զերիս սենեակս քայքայեալ 'ի շարժէն: Ծեփեալ սպիտակացուցին և զեկեղեցին Հրեշտակապետի, ընդարձակեցին զաւագ դուռն ըստ առաջին ձեւոյն, և զպատուհանսն:

Ի բողոքել Զաքարիա Եպիսկոպոսի առ Փոխարքայն Եգիպտոսի վասն անկարգութեան այլազգի դռնապանաց Տաճարին Ս. Յարութեան անաստեղծ հրամանի Արքային՝ գրեաց նա պատուէր առ Դատաւորն Երուսաղէմի, զի լիցին դռնապանք միայն անձինք 3 մնալ մշտնջենաւոր բանալեաց 'ի ձեռս նոցա: Վասն պատարագի 7<sup>1</sup>/<sub>2</sub>, ուխտի 2, յաւուրս հանդիսաւոր տօնից 39 դահեկան առնուլ 'ի քրիստոնէից և բանալ զդուռն: Ի ժամանակի բազմութեան բանալ զերկու վնդիս, բաց 'ի սահմանեալ իրաւանց չսահանջել 'ի վանօրէից պարգեւս և զայլ նորանոր իրս, և 'ի պատուի ունել զուխտաւորս քրիստոնէից:

Ի պատահիլ երկրաշարժի յերուսաղէմ խախտեցան բազում եկեղեցիք և այլ հոյակապ շինուածք. անկաւ և զըմբեթն որ 'ի վերայ ոտնատեղւոյն Համբարձման Տեառն մերոյ 'ի լեառն Ձիթենեաց: Լատինք խնդրէին հրաման 'ի Դատաւորէն շինել զայն ըստ առաջին ձեւոյն, Հայք ունելով զվաւերական գրեանս վասն այնր տեղւոյ, ընդդէմ կացեալ նոցա ջանային ինքեանք շինել զայն, և մինչդեռ վիճէին երկու ազգք, յարեան և Յոյնք եւ խնդրէին լինել բաժանորդ շինութեանն: Լատինք մատուցին 'ի ժողովի անդ Հէօճճէթ գրեալ 119. թուէն, յորում էր հրաման 'ի տարւոյ միանգամ պատարագել նոցա 'ի ներքոյ գըմբեթին, զի այլ Քրիստոնէայք պատարագէին 'ի գաւթի անդ 'ի ներքոյ վրանի՝ 'ի վերայ իւրաքանչիւր սեղանի իւրոյ, և 'ի սաստ-